

Ministro a otorga reconocimiento na Randy Dirksen pa su sosten den Dande

ORANJESTAD (AAN); E ta un persona cu pa hopi aña caba ta visible riba escenario na Festival di Dande, y tambe tocando cu gruponan cu ta bay riba paranda asina cu Aña Nobo bati.

Tabata un momento fenomenal ora cu Ministro Xiomara Maduro, encarga cu cultura, a entrega un reconocimiento na Randy pa su sosten continuo pa cu e cultura di Aruba, particularmente Randy.

E carera musical di Randy Emiliano Dirksen a cuminsa na aña 1993-1994, cu grupo di Dande di Dominico "Cochin" Willems y Tico Oduber. Randy e momento ey tabatin edad di 16 aña, y el a bay den e paranda di dande ta toca wiri.

Carrera musical a sigui crece ora cu a forma parti di Tipico Santa Marta di Donisio "Eti" Willems hunto cu su ruman homber Renald Dirksen na aña 1996, tocando guitarra.

Na aña 1998, Randy a pasa forma parti di Tipico Guadirikiri, bao encargo di Sr. Haime Croes, como tocado di win y a keda forma parti di Grupo Guadirikiri te aña 2002.

Na aña 1999 el a competi pa prome biaha como cantante den categoria propio composicion cu e cancion "Chiste 99" cual ta worde recorda ainda cu e letranan "ta pa via di Nel".

Na aña 2004, Randy a dicidi di forma un grupo di Dande cu Ivan Croes y algun miembro di famia y amigonan pa e paranda di dande por a sigui, e aña aki a tuma e reto di bira instrument lider tocando fiyo (violin) pa prome biaha durante paranda di dande. Lamentablemente despues di e aña aki, algun familiar a fayece y e grupo a keda inactivo.

Na aña 2005-2006, el a forma parti durante paranda di dande di Robert Madura y su Alma Folklorico y a toca, fiyo, guitarra y tambe wiri y asina a haya mas experiencia como musico di paranda nan di dande. Despues tabata aria 2009-2010, a forma parti di grupo di Dande di Francis Jacobs y a toca guitarra durante e paranda aki, lamentablemente 13 dia despues di aña nobo, Randy su querida mama a fayece y a keda un aña inactivo for di musica.

Na aña 2012, Randy a forma parti di grupo di Frenk Kock y su grupo pa paranda di dande y a toca wiri den temporada ey.

Na aña 2013-2014, hunto cu su colega Wladimir Wolf e tempo ey, a cuminsa papia di lanta un causa, cual causa a worde yama, e "Dande di tradicion" cu den nan concepto no mester ta un dande na careda of dande di drenta-sali, of dande pa haci negoshi, a invita algun musico di experiencia pa forma parti di e grupo aki, pero lamentablemente hopi di nan a "zeg af" na ultimo momento. Pero asina mes e paranda a sigui cu 4 hende, Wladimir Wolf cu wiri, Kenneth Leest cu maraca, Rolando Tromp cu tambora y Randy Dirksen cu mandolin y cantando. No tabata facil ya cu nunca a yega di toca mandolin, pero e causa mester a sigui.

Su siguiente aña a dicidi di invita mas musico, a splica over di e idea di e causa, y awe te ainda e grupo di Dande ta existi. Pa esey, un palabra di danki na tur esnan cu a yuda pa e causa sigui, cu a yega di forma parti di e causa y cu ta formando parti di e causa, Wladimir Wolf, Kenneth Leest, Franki Geerman, Anthony Giel, Luis Alvarez, Emiliano Dirksen, Renald Dirksen y Randy Dirksen cu ta activo cu e grupo, y esnan cu a yega forma parti tabata Rolando Tromp, Richard De Luvia, Ronny Croes, Jelissee Boekhoud, Nicolaas Coronado.

Na dos ocasion Randy a forma parti di Tipico Nos Folklor pa festival di dande, bao encargo di maestro y amigo Vio Wester, un biaha como acordeonero y otro biaha cu mandolin. Como musico Randy a forma parti di varios banda cu a competi y participa den evento di carnaval, a forma parti di Zodiac Band, Orquesta Dream, Dejavu, The Creators, Orquesta Reload, Claudius Philips y su grupo Oreo, Orquesta Delicious, grupo STEAM y actualmente ta activo cu Musical Time como guitarrista. Y pa festival di dande a fungi varios aña como miembro di hurado y tambe tabata president di hurado na algun ocasion.

